

大正炬陀羅尼經

才十四

百八十
短四

4856



元祿九年丙子二月日重修

皇國肇開 帝階綴昌

佛日增輝 懺輪常轉

山城州天安寺法金剛院置

大法炬陀羅尼經卷第十四

隋天竺三藏法師 闍那崛多等譯

短

入海神變品第三十一

佛昇須彌山頂品第三十二

入海神變品第三十一

佛告阿難時放光如來應供正徧覺捨是師

子奮迅大三昧已即以大慈及一切智徧觀

四方及以大衆時彼衆中有一菩薩摩訶薩

厥名井宿本是作寶摩尼家子時彼世尊即

告之言井宿汝今能與如來應供正徧覺俱

往入彼大海不耶尔時井宿菩薩摩訶薩白

佛言世尊如來應供正徧覺於彼海中欲行

何事將作何業願命乃尔放光如來告井宿
言摩那婆大海東邊有一水口名爲焦熱彼
焦熱下有阿脩羅宮殿住處彼今現有十四
菩薩生在其中我以彼等受大苦故又欲令
彼生厭離故又不令彼久受如是阿脩羅身
故又欲令彼不復造作阿脩羅業故又欲令
彼不造種種地獄業行故佛說是已井宿菩
薩白言世尊度海何住放光佛言摩那婆彼
焦熱處有阿脩羅王名曰善解十四菩薩爲
彼王子井宿菩薩復言世尊更何因緣斯諸
菩薩生彼中也佛告井宿言摩那婆汝今不
煩重問是事我等惟應速疾詣彼尔時放光

世尊如是言已即與井宿菩薩摩訶薩乘化
金翅鳥遊空而進及彼億數諸菩薩等亦乘
化金翅鳥隨從世尊復有九十億大阿羅漢
亦各乘彼化金翅鳥隨從世尊又彼一切人
中大衆及祭火光王將諸兵衆二萬八千大
將爲首又乘八萬調善香象隨從世尊陵虛
而往其王自在有大威德彼諸臣衆二萬八
千皆乘白象隨從而行自外無量無邊諸世
界中一切天龍夜叉乾闥婆阿修羅等先在
放光佛世尊所聽聞法者各各亦以神通之
力從佛而行尔時放光如來先至大海飯食
訖已度海南岸東漸而行至焦熱處遂便停

止阿難時彼世尊住海岸已即從眉間放一
細光如破一毛爲百千億分其光直入阿脩
羅宮徧照阿脩羅宮殿已時善僻阿脩羅王
遇斯光明不覺驚起莫能自安一切脩羅皆
大恐怖速疾馳詣善僻王所自言大王宜時
觀此阿脩羅宮忽有如此大盛光明大王今
者將無劫災非常火事從上起耶故先見此
熾然猛焰極盛光明暉赫若斯大王如其不
尔何緣今日阿脩羅宮忽有如是異相現也
時善僻阿脩羅王告諸阿脩羅衆言諸仁者
汝等當知放光如來應供正徧覺今在海岸
欲來臨頤阿脩羅宮諸仁當知以是因緣放

光如來遂從眉間白毫藏處放一光明如破
一毛爲百千億分是彼光明現此宮耳諸仁
者如來光明甚難值遇不可得見爲汝等故
今來至此諸阿脩羅住大海下境界周圍皆
置水道一一隄防若須彌山時彼世尊作如
是念此阿脩羅惟以驚恐設險自衛非有他
故即便命召一金剛神名曰火焰告言汝爲
大神能變化不金剛白言世尊我能變化佛
復問言汝化云何金剛神言我以神力於水
道前一一皆現兩巨壯人大力可畏住彼道
口令阿脩羅忽見如是偉壯大人恐怖轉增
自然降伏佛言金剛汝必能者速爲是化時

金剛神承佛教已即以神力於水道前皆各
化現有二化人其形高大若多羅樹而彼化
人以手打拍是諸水道皆令陷沒直至水輪
時諸脩羅皆大恐怖各相謂言希有希有我
此宮城深密難至加以諸大羅刹周衛圍遶
是何怖事而復現前諸仁共觀欲何逃竄也
復作是念我等今者亦可共往至彼海岸介
時善解阿脩羅王知諸脩羅皆大恐怖遂即
命彼十四兒言汝等觀此阿脩羅宮競出如
是種種恠異童子我等當今宜作何事時彼
童子白父王言大王當知今諸脩羅皆已處
於梅檀林中有何可怖善解王言童子今放

光如來欲有所作至此海岸以威德故令阿
脩羅陀那婆等生大恐怖彼諸童子復白父
言大王審知如來應供正遍覺所由來此脩
羅宮耶王言童子我今何處有是心想彼如
來應供正遍覺口初未說我復何事能豫知
也童子復言大王自從昔來頗曾見聞世尊
來入脩羅宮不王言童子我從生來未聞見
也諸阿脩羅不信三寶寧能見佛童子我初
未曾見有因緣而今如來到脩羅宮惟彼諸
天共阿脩羅大戰鬪時諸佛世尊方出現耳
以於彼時見諸天勝阿脩羅屈諸脩羅等以
不如故驚怖奔波迷失方所避害藏竄逃入

藕根我於今日以如是想言佛威靈而諸如
來終亦不於一衆生處生不善心起惡憎想
不求過失惟有哀矜見阿脩羅心如刀劍慈
悲普覆現是神通今諸脩羅捐捨惡念得本
心耳亦時放光如來爲彼億數諸菩薩衆九
十億諸大羅漢及祭火王所將六十萬兵將
人民乃至一切天龍夜叉乾闥婆等如是諸
衆皆爲化作一金剛神執杵隨後侍衛守護
又皆化爲諸金翅鳥以爲乘具作是化已趣
焦熱口至彼住處復皆變作非人圍遶令阿
脩羅增恐怖故時善解王在殿經行見彼世
尊以無量億百千那由他衆前後圍繞所謂

菩薩聲聞祭火王衆乃至無量天龍夜叉乾
闥婆八王衆等如是見已告童子言童子汝
當觀此如來應供正遍覺今以如是大威神
故令諸脩羅栴檀林中生是恐怖童子白言
大王我等已見時彼童子覩世尊已作是念
言此等衆生非以隨宜少分力故能致如是
惟有具足精進力者乃能若斯衆力來此阿
脩羅宮我等今觀如是希有實未曾見如是
竒事所謂一人後皆有如是大可畏人持
金剛杵彼諸比丘亦各一人執持金剛一切
皆乘金翅鳥上復有無量諸天諸龍夜叉乾
闥婆等衆前後圍遶復有娑婆世界主大梵

天王各與無量眷屬天衆侍立左右復與無
量釋提桓因四天大王及祭火王乃至無量
千數小王一切圍遶我等今應投敬如來世
尊足下介時善解阿脩羅王知諸子意即告
之言童子汝等今宜隨所樂往時諸童子白
父王言大王今者欲爲何事善解王言我諸
脩羅不信三寶彼諸童子復白父言大王若
不去者佛當自來王言童子吾聞佛者有如
是智不從他聞皆自能知斯言信乎諸童子
言大王實有是智雖不聞說咸自然知何以
故大王諸佛如來於彼三世一切衆生所有
心念若生未生若滅未滅皆悉了知是故一

切諸佛世尊無不知者無不見者無不證者
無不覺者無不忍者諸佛如來是一切知是
一切見時善解王語童子言必如汝言我此
殿小云何得容若斯大眾諸童子言大王我
等意見如是衆生無有住處王復問言何緣
若此諸童子言大王於意云何此脩羅宮住
在何處王報之曰住在水中童子復言大王
且觀今有尔許諸大人衆處此水中乃至無
一衆生及一衣角被沾濡者是故我等作如
是念如是衆生無有住處大王又觀我等所
見一金翅鳥王於中即有無量億百千那由
他數金翅鳥王而爲乘也阿難時放光如來

念彼善僻阿脩羅及念童子言已告井宿菩
薩摩訶薩言井宿汝宜速往善僻阿脩羅王
殿上坐已即應入是大精進三昧也於是井
宿菩薩承世尊教直趣善僻阿脩羅殿到已
昇殿端身正念結跏趺坐即便入彼大精進
定時井宿菩薩既入如是精進定已三昧力
故即令彼殿東西寬大六萬四千由旬南北
一萬六千由旬莊嚴奇特七寶所成而彼衆
寶多是無價摩尼真珠如是勝寶微妙端嚴
流布乃至如來足下衆寶羅網彌覆其上復
於諸處皆懸繒綵又燒天上種種妙香彼宮
殿外周帀皆有七重濠塹以無價寶間錯莊

巖岸高齊等風聚其間八功德水具足盈滿
其水清淨無諸汙濁於其壑內多有衆華所
謂優鉢羅華波頭摩華拘牟頭華分陀利華
如是諸華滿彼壑內彼華芬馥猶如天上曼
陀羅香其壑兩岸多有衆樹所謂天妙香樹
天妙華樹天妙果樹天衣服樹天飲食樹天
衆寶樹天瓔珞樹天音樂樹又彼諸壑兩岸
多有赤栴檀樹周帀圍繞如兜率天宮爲補
處菩薩之所莊嚴此殿亦尔皆是化作尔時
井宿菩薩摩訶薩一心正念從三昧起即便
往詣放光佛所到已頂禮如來足下白言世
尊我蒙聖教所作已辦咸爲此衆嚴敷座訖

尔時放光如來告井宿菩薩言善哉善哉摩
那婆汝諸菩薩知如來念將說斯法既了知
已依如來教如是作耶時善僻阿脩羅王告
諸童子言諸童子汝觀此殿何忽乃有如是
事業自然起乎時諸童子即白父言大王於
是事中不應驚恠何以故如來世尊具足神
力如來復有不思議智今此所作神力少分
何足生恠此又如來弟子所爲非如來作如
來世尊別有不思智業尚非一切衆生境界
豈一衆生而能知也阿難時諸童子即惣發
心念如來時如來即知彼諸童子心之所念
遂便告彼諸大衆言汝等今者一切皆可入

彼青相三昧。尔時一切大眾蒙佛力故。皆得入於青相三昧。入三昧已。不覺不知。忽昇彼殿。猶如有人夢中遠行。彼諸大眾不動不覺。以如來力。即昇彼殿。亦復如是。尔時善辟阿脩羅王。見彼世尊及諸一切聲聞菩薩天人。大眾一切。皆居金翅鳥上。一切皆有金剛蜜迹。隨逐其後。見此事已。各作斯念。如是幻化諸誑惑事。惟我等有餘人。則無復作。是念我今亦應普現如是諸幻化事。作是念已。即時欲作種種幻化。雖發是意。悉不能成。乃至於彼一彈指頃。亦不能化。而亦不能現一色相。彼身所經。出沒之處。莫不皆見金剛力士可

畏大身手執金剛放光神杵欲擊其頭彼見是已即便還攝幻化之事設欲有作終亦不成尔時復作如是心念我曹今日云何忽遇若斯苦惱令我喪滅是幻術法我常以此爲嚴身處今定失者何所歸趣我身不久亦自磨滅尔時彼諸童子即白父言大王願於今者莫生恐怖王今宜速敬禮世尊若離如來何所歸依凡所至處皆是恐怖是故惟速禮拜如來時彼阿脩羅王問諸子言如斯境界是誰作也童子報言大王此等皆是如來境界如來方便大王當知諸阿脩羅雖有千數諸幻術法不及如來而諸如來乃有無量不

可稱數不可思議諸幻化法大王今者欲何
所趣假使即時更入海底焦熱口中望免如
是諸大人者終不得脫大王今日且少時住
如來足下勿過自憂大王且觀弟子神通尚
現如是不思議事況如來也尔時彼佛作如
是念斯諸童子於正法中無有錯謬我今應
當覺以正法而今成就即彼如來如是念時
諸童子等便自覺知既覺知已如是思惟今
此如來憐愍我故而來至此我於今日應強
扶持我父大王詣如來所彼等思已各於父
所生大敬心歡喜之心手執父臂或捧身分
競共扶侍詣如來所至佛所已如彼知足諸

菩薩等敬心禮拜此亦如是時十四童子及其父王一切皆以四支布地頂禮放光如來足下如是慇懃至於再三禮已胡跪以手扣頭從坐而起右遶七匝具尊重心發希有意時彼童子便白父言大王於意云何如是衆生寧當爲彼微少因緣入是海底焦熱口耶

是焦熱口未曾有人能至斯者所以者何此焦熱口如是臭穢如是麤鄙是極惡行衆生居處是最不信衆生住所不順父母不事師長不敬沙門及婆羅門諸如是輦具足非法衆生之中今者世尊何爲來此大王以有大事重因緣故遂使如來應供正遍覺自然降

臨此弊宮殿時彼善僻阿脩羅王聞是事已
告諸子言諸童子我今當集諸阿脩羅陀那
婆等設諸供具奉獻世尊如是語已即便勅
語一阿脩羅名曰上軍汝今可往焦熱上立
吹千音螺并擊大鼓召諸脩羅陀那婆等悉
令來集所以者何如來世尊及弟子衆今旣
願此吾當辦供奉佛及僧是時上軍阿脩羅
承王勅已至焦熱上吹千音螺并擊大鼓出
大音聲時大海內及焦熱處一切脩羅及陀
羅婆諸龍夜叉羅刹惡鬼乃至海中所有衆
生聞是聲已皆大恐怖作如是念何緣今日
諸阿脩羅出是大聲將非諸天與阿脩羅興

大鬪戰乃於今者吹貝擊鼓有是大聲如是
念已一切皆集善僻王所白言大王今日何
緣吹貝擊鼓得不有彼諸天事乎尔時善僻
阿脩羅王即便告勅諸阿脩羅及陀羅婆等
言汝等當知如來正覺今既降此吾將獻供
故命汝等無他事也尔時諸阿脩羅陀那婆
等聞王教已即共上殿皆見彼殿希有莊嚴
假使一切諸天及人乃至龍宮亦未曾有如
是殊特微妙嚴麗彼既見已心生歡喜歎未
曾有白言大王何故今日此宮殿中乃有如
是大莊嚴事我觀諸天及龍宮處初未曾見
若斯事也王時答言汝今雖見尚未覺知誰

心願力所能爲此大王我實不知誰之所作
善辭王言汝應當知今此有佛号曰放光及
諸聲聞大菩薩等乃至一切天人大衆皆來
住此彼佛弟子名曰井宿是大菩薩摩訶薩
也坐此殿上惟心願力能於一彈指間即便
化作是莊嚴事尔時善辭阿脩羅王與九十
億那由他諸阿脩羅及陀那婆諸龍等衆乃
至大海所有衆生聞是鼓貝出大聲時心無
異慮不作餘業各作是念今日海中欲有何
事彼善辭王吹是大貝擊此大鼓尔時善辭
阿脩羅王及大兵衆昇殿遍觀見彼如來乃
爲無量百千大衆周而圍遶左右前後有千

數衆無量億數無量百億數無量千億數無
量百千億數無量那由他數無量百那由他
數無量百千那由他數復有無量聲聞大衆
人衆天衆無量梵天衆無量淨居天衆亦左
右圍遶彼佛世尊復見所有諸聲聞衆若出
家若在家若天若龍一切皆有金剛力士執
金剛杵光明熾然甚大可畏隨逐其後守護
彼等復見各乘金翅鳥王如是見已心生竒
特歡喜踊躍各作是念是等皆悉大神通力
故能來此汝等當觀此希有事是佛世尊有
一弟子於彈指間以心願力能爲如是大莊
嚴事亦此放光如來有大神通具力無畏能

爲斯耳彼聞是已一切皆起未曾有心希有
之心殊特之心發是心已一切皆悉同意同
心至心敬重在如來前身體布地禮敬尊足
阿難時放光如來知阿脩羅陀那婆等皆有
如是至誠心故於少時間即便入於水澄三
昧彼佛如來入三昧時諸阿脩羅及陀那婆
蒙佛力故得宿命智皆得自見過去所作諸
阿脩羅業因緣事既見此已生大苦惱各作
是念我於往昔造諸惡故今日生此阿脩羅
宮由此種種不善業故得如是等可畏大身
然此三千大千世界無有衆生能造如是可
畏恐怖大惡業者而諸脩羅各自入定皆悉

覩見往昔本業旣覩見已生大恐怖慮命終
後必墮地獄生地獄時身量大小及諸苦報
咸悉明了所謂獄卒諸罪人等手持刀劔斤
鈇矛戟積稍杵梃種種苦具競來迫身又復
覩見鑊湯鑪炭炎熾猛火山河灰糞皆悉充
滿除地獄已其餘更無如是嚴赫熾然苦具
彼見是已復生大怖假使世間七日並出天
地萬物盡皆消融比茲猛火不得爲喻覩是
事已各相謂言我阿脩羅及陀那婆須臾之
間悉皆滅沒今日之計將何所出而可獲免
阿難尔時放光如來舉金色手令諸脩羅及
陀那婆皆悉起立各各皆見放光如來以金

色手親摩其頂以見如是大神力故於如來
所更起重心於是皆共右遶七帀合十指掌
復遶七帀任於佛前尔時善僻阿脩羅王整
理衣服偏袒右膊右膝著地合掌一心而白
佛言世尊惟願如來及諸大衆憐愍我等受
是微供尔時佛告善僻王言諸阿脩羅如是
如是時諸脩羅旣蒙許已皆大歡喜踊躍無
量從彼衆出詣佛足下白言世尊蒙垂哀許
隨宜備辦

大法炬陀羅尼經佛昇須彌山頂品第三十二
阿難尔時放光如來欲從大海焦熱口出昇
須彌頂忉利天宮時天帝釋即便命一主食

天子名曰慢上作如是言汝所造食得成辦
不食天荅言唯然天王食皆辦具天帝復言
汝辦幾何食天荅曰隨須多少我能應時於
是天帝聞食天言如一瞬頃已住佛前白言
世尊願知此時尔時放光如來告善僻阿脩
羅王言善僻汝今欲見須彌山頂忉利宮不
善僻白言世尊今日誰當聽我至彼須彌山
頂受天樂乎佛言善僻汝可來也乃至一切
阿脩羅陀那婆等我悉能令至彼山頂天王
帝釋善法殿上隨諸所須恣意而食時善僻
王即白佛言世尊彼上諸天與阿脩羅及陀
那婆等世興鬪諍今日云何得有斯事佛告

阿脩羅王言善辭汝今當知如來言教正汝心
念我於今者能令汝等諸阿脩羅與彼諸天
和合聚集共處宮殿無令一人有苦迫者尔
時世尊告天帝釋言憍尸迦汝宜速還當爲
尔許諸大衆等敷設牀坐時天帝釋即白佛
言世尊謹承聖教於是天帝自焦熱處沒於
須弥山頂出尔時天王勅一敷設天子名曰
玄宿汝今速詣善法殿所敷諸牀坐以擬世
尊彼敷設天奉天王教趣善法堂欲敷牀坐
已見如來與諸弟子及諸天衆諸梵天衆諸
阿脩羅陀那婆衆一切人衆皆先坐訖尔時
敷天見佛大衆先坐已定便欲設食白帝釋

言天王當知今者如來與諸弟子天龍大衆咸先坐於善法殿訖時天帝釋作如是念希有希有此忉利天極成迷謬世尊今有如斯神力而我天等不覺不知又見如來幸其宮殿歡喜踊躍不能自勝於是天帝釋尋即告一筭天之子名跋利沙汝今速往擊是天鼓令此忉利諸天及時雲集跋利沙天受天王勅遂極其力搥擊天鼓時諸脩羅陀那婆等聞天鼓聲悉皆驚怖發如是言苦哉苦哉我等今者大厄時至汝等當知是天帝釋以大幻術誑誘我徒而今至此時天帝釋知諸脩羅心生恐怖重復告彼阿脩羅王汝等勿怖

我向爲集忉利諸天擊是天鼓幸無他慮尔
時三十三天各與無量百千億數眷属天女
詣善法殿到已頂禮彼世尊足心大歡喜各
相謂言汝今當觀如來世尊大神通力諸阿
脩羅及陀那婆常居地下今乃能令至此天
上尔時天帝釋勅三十三天曰汝諸天衆咸
各一心勿念餘事惟思供養如來大衆彼天
帝釋如是勅已以自所食諸供養具奉上世
尊與弟子衆及祭火王一切人衆諸阿脩羅
陀那婆衆欲界天衆諸餘天衆無有筭數不
可稱量如是等衆皆來會坐彼等一切食衆
天味悉得充滿如彈指頃飯食咸畢當尔之

時帝釋天王立食不坐覩佛世尊飯食訖已
喜踊徧滿不能自持斂容合掌任於佛前介
時世尊告善僻阿脩羅王言善僻汝來從今
已去與此天王解除宿怨生歡喜心汝亦是
吾聽法弟子汝等二人常應和合行如來法
勿復戰諍也時天帝釋及善僻王共白佛言
世尊諸阿脩羅及以諸天恒有鬪心終不能
得自生歡喜幸蒙世尊威神德力令阿脩羅
至此天宮時彼二王如是語已彼放光佛告
天帝言憍尸迦汝於今者莫作是語何以故
今日之事乃是汝斯十四童子菩薩摩訶薩
慈悲力也是故憍尸迦汝當知此十四菩薩

往昔因緣過去於此三十三天中生見此諸
天常念與彼諸阿脩羅興大戰誶更相殘害
受諸苦惱起大慈心願我未來得生於彼阿
脩羅宮與善僻王七大夫夫人各爲二子旣生
彼已我應教化彼阿脩羅與此諸天常生歡
喜無復怨心如果所願假令於彼住壽經劫
亦不敢辭憍尸迦以是因緣斯諸菩薩於此
天沒爲善僻王子然而此等自度智力不能
獨成如是大事是故今者請求如來應供正
遍覺令彼速出焦熱之難此等在彼發如是
言願諸世尊哀愍我等今在大厄難處
雖有本願不獲剋成今所生處多諸大苦大

險巨難設我生彼大地獄中終不捨離本誓
願心憍尸迦汝今應知此諸菩薩於彼昔時
有如是願憍尸迦於意去何如來世尊能護
持是諸菩薩不天帝釋言如是世尊如來能
爲一切畜生豺狼狐犬乃至蚊蟻而作護持
何獨菩薩摩訶薩等斯輩能爲一切衆生無
救護者爲作救護猶如生盲處於無明大黑
闇中不能自出彼能散除亦復如是尔時放
光如來告天帝釋言憍尸迦汝今問此阿脩
羅王汝今樂住此天處不時天帝釋承佛聖
旨即問善僻阿脩羅王曰仁者汝聞世尊言
教以不善僻王曰如是如是惟大天王帝釋

復言仁者汝今實願處此以不善辟王言天
王如是之事不應致問何以故我諸脩羅今
所生處假使亦有諸栴檀林及餘別所惟甚
臭惡寧敢望是諸天宮殿直以世尊大慈威
靈普及一切令我至此須彌天宮天王汝之
問我我願如是我應問汝汝不應問我何以
故是三十三天自然福報無所乏少我諸脩
羅不能爲福多事諂誑自茲已外餘皆乏少
是故我今貪樂此處復次天王我今重白諸
阿脩羅長夜願樂須彌山上食諸天味飲蒲
桃漿爲此三事常與天諍以是義故亦有乏
短以短乏故受諸苦惱於鬪戰時彼有四王

以種種杖擊害我等退走本處天王以是因緣我應問汝不應問我復次天王譬彼丈夫貪欲女人以諸財寶多爲方便彼雖相許未會求心是人介時長夜憂苦後時彼女果獲一來天王於意云何彼時丈夫旣獲是女爲極歡不天帝釋言如是如是阿脩羅王善辭復言如是天王諸阿脩羅恒有是心令我得居須彌山頂諸天之事我盡見知是故我今願樂住此若不樂者何事須問復次天王如彼賁主欲入大海求諸珍寶不顧危險是人棄家始達海岸忽值衆船載赤栴檀自然而至或種種船異寶充滿一時競來天王於意

云何彼時賁主不經險難多獲異寶復極歡
不天帝釋言彼大賁主喜成無量善辟復言
如是天王諸阿脩羅及陀那婆不殖善根不
造功德今者忽獲難至之所若不歡喜無有
是處時天帝釋與阿脩羅王二俱歡喜共詣
世尊頭面禮足住於佛前尔時世尊語帝釋
言僑尸迦汝與脩羅大鬪諍事得寧息耶又
與脩羅及陀那婆鬪諍因緣得斷除未時天
帝釋白言世尊我蒙佛教已成一味唯然世
尊而我初無如是惡心害諸脩羅但是脩羅
甚可憐愍頗修苦行得少身力心懷不忍好
與我諍世尊彼輩不知我有乘象其名億頃

若使此象一奮怒者即能乾竭彼大海水如其交陣大戰鬪時復能化作巨大身如須彌山任持大地四足及鼻隨以一足亦如須彌世尊當知彼象其身幾大彼大海水復多少耶佛言憍尸迦如是如是時天帝釋復白佛言世尊我於今時作如是念我有如是不思議象我既乘已復如是念觀諸脩羅陀那婆等誠大愚惑不能覺知我有如是不思議力世尊今且置茲身外大象不思議力而我復有右手所執大金剛杵我復作念若使我今試放手中所執金剛其所往處四大海內諸阿脩羅及陀那婆所有宮殿一時滅壞世

尊我今雖有如是神力終不起心欲壞彼等
世尊其有不退轉地菩薩摩訶薩被他縛時
若他打時若他割時若他截時欲報害者終
無是處惟佛世尊自知是事世尊若彼菩薩
摩訶薩對是事時自應常作如斯善念我捨
自身一切樂已世間所有欲離壞者我要當
令彼還和合彼時菩薩常當念行如是慎意
不亂其心恒須念法世尊我從今日順世尊
教如世尊教又如諸佛弟子各還供養諸佛
弟子我等亦當各各自相恭敬供養世尊我
從今日凡是飲食悉皆與此善解阿脩羅王
分張共食諸餘阿脩羅陀那婆等咸施無畏

不令恐怖也

大法炬陀羅尼經卷第十四

短

厥

居月反其也

翅

音施去聲

暉赫

下許客反明盛白也

隄防

上二佞

音音

下房偉壯

上也

奇紆鬼反也異也

大陷沒

去上咸聲

逃竄

上下

反乱

藕根

蓮上音

也

矜

居陵反也

拍

音也

而

也濕

繒綵

陵上反

濠壘

反上音

毫下七

馥

音也

香

也

求矣反

扣頭

口苦候反

一

弊

也

吹貝

貝

螺

博帶也

釘鉄

下上音

矛戟

下居反

積稍

上上反

貝

下朝

音杵梧

上尺反

或作

下蒲

融

反余弓

瞬頃

上詩反

謂

一項動目之間也

玄宿

上音


搗

小

反

狽狼

反



上音野柴
 下音郎
 蚊蟻
 上音倚
 文下
 舟音白
 火

